

Yang Di-pertuan Agong Lakukan Lawatan Negara ke Singapura Esok
Bernama
Mei 17, 2014

SINGAPURA, 17 Mei (Bernama) -- Yang di-Pertuan Agong Tuanku Abdul Halim Mu'adzam Shah akan melakukan lawatan negara selama empat hari ke Singapura mulai esok.

Kementerian Hal Ehwal Luar (MFA) Singapura, dalam kenyataan hari ini berkata berkata Tuanku Abdul Halim dan Raja Permaisuri Agong Tuanku Hajah Haminah akan diberi sambutan penuh istiadat di Istana.

Seri Paduka berdua akan melakukan kunjungan hormat terhadap Presiden Tony Tan dan isteri Mary Tan, yang akan meraikan baginda berdua pada majlis jamuan negara.

Perdana Menteri Lee Hsien Loong dan isteri juga akan membuat kunjungan hormat ke atas baginda berdua.

Semasa lawatan negara, Seri Paduka berdua akan berkenan melawat Gardens by the Bay, Reflections di Bukit Chandu, dan Night Safari.

Pelawat diraja itu juga akan melawat Taman Orkid Nasional di Taman Botani Singapura dan sempena lawatan, spesis bunga orkid akan dinamakan sempena nama baginda berdua.

Menurut MFA, lawatan negara oleh baginda berdua ialah sebagai membalas lawatan negara Presiden Tan dan isteri ke Malaysia pada September 2013, dan mencerminkan hubungan akrab dan telah lama terjalin antara Singapura dan Malaysia.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1039058>